



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 044146 22 Iž**  
**Sarajevo, 19.10.2022. godine**

Sud Bosne i Hercegovine u Sarajevu, u apelacionom vijeću sastavljenom od sudija Dinke Bešlagić-Čovrk kao predsjednika vijeća, Vesne Trifunović i Srete Crnjaka, kao članova vijeća, odlučujući o žalbi političke stranke Koalicija HDZ BiH HSS BiH, HSP AS, HKDU, HSPAS, HDU, HSPNHB, HRAST Mostar ulica Kneza Domagoja bb koju zastupa Dr. Dragan Čović, izjavljenoj protiv odluke Centralne izborne komisije Bosne i Hercegovine broj: 05-01-07-5-4127/22 od 29.09.2022.godine, o utvrđenoj odogovrnosti i novčanom kažnjavanju za kršenje odredbi Izbornog zakona BiH, na nejavnoj sjednici, održanoj dana 19.10.2022.godine, donio je

**R J E Š E N J E**

Žalba se odbija.

**O b r a z l o ž e n j e**

Odlukom Centralne izborne komisije Bosne i Hercegovine broj i datum navedeni u uvodu:

- 1) Utvrđeno je da je politički subjekt Koalicija HDZ BiH HSS BiH, HSP AS, HKDU, HSPAS, HDU, HSPNHB, HRAST s ciljem pogodovanja drugom političkom subjektu Stranka za Bosnu i Hercegovinu-SBiH zloupotrijebila zakonsko pravo na učešće u radu biračkog odbora, čime je prekršena odredba člana 7.3 stav (2) Izbornog zakona BiH, pa mu se na osnovu člana 6.7 stav (2) tačka 1) Izbornog zakona BiH i primjenom člana 19.9 stav 1. tačka 12) izrečena novčana kazna u iznosu od 4.000,00 KM.
- 2) Utvrđeno je da je politički subjekt Stranka za Bosnu i Hercegovinu-SBiH zloupotrijebila zakonsko pravo na učešće u radu biračkog odbora, čime je prekršio odredbu člana 7.3 stav (2) Izbornog zakona BiH, pa mu je na osnovu člana 6.7 stav 2. tačka 1) Izbornog zakona BiH i primjenom člana 19.9 stav 1. tačka 12) ovog zakona izrečena novčana kazna u iznosu od 4.000,00 KM.
- 3) Utvrđeno je da Jasmin Maličević član biračkog odbora na biračkom mjestu 039A028A Tešanj 4-Krndija u Osnovnoj izbornoj jedinici Tešanj, odgovoran što je zloupotrijebio zakonsko pravo na učešće u radu biračkog odbora, čime je prekršena odredba člana 7.3. stav (2) Izbornog zakona BiH, pa mu je na

osnovu člana 6.7. stav 2. tačka 1) i 4) Izbornog zakona BiH i primjenom člana 19.8 stav 2. tačka 12) izričena zabrana angažovanaj za rad na biračkom mjestu, odnosno organima nadležnim za provođenje izbora u periodu od 4 godine računajući od dana pravosnažnosti odluke.

Protiv ove odluke, žalbu je izjavio politički subjekt Koalicija HDZ BiH HSS BiH, HSP AS, HKDU, HSPAS, HDU, HSPNHB, HRAST radi, pogrešne primjene procesnog prava, nepotpuno i pogrešno utvrđenog činjeničnog stanja i pogrešne primjene materijalnog prava. Navodi da lice koje su predložili za člana biračkog odbora nije u krugu lica koja prema članu 2.3. stav 1 Izbornog zakona ne mogu biti imenovana, te da ni jednim zakonom nije propisano da član jedne političke stranke ne može biti u biračkom odboru druge političke stranke, koalicije ili nezavisnog kandidata. Ističe da Centralna izborna komisija BiH ničim nije dokazala da je zloupotrebjen zakon i da se pogodovalo drugom političkom subjektu. Koalicija je u skladu sa članom 2.19 Izbornog zakona BiH dobila mjesta u biračkom odboru u Opštini Tešanj i blagovremeno dostavila putem ovlaštenog predstavnika prijedlog člana biračkog odbora Jasmina Maličevića koji je uredno popunio i potpisao SG-1 obrazac. Smatra da je odluka protivna zakonu, paušalna, proizvoljna i diskriminiše žalioca jer mu onemogućava da pod jednakim uslovima sudjeluje u izbornom procesu. Predlaže da se žalba uvaži i poništi osporena odluka.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Žalba nije osnovana.

Prema stanju u spisu Centralna izborna komisija BiH je na osnovu podneska Udruženja za borbu protiv korupcije „Transparensy international“ u BiH informisana o okolnostima popunjavanja biračkih odbora zbog trgovine mjestima u biračkim odborima u Osnovnoj jedinici Tešanj. Informacija je cijenjena kao inicijativa za postupanje Centralne izborne komisije po službenoj dužnosti u kojem postupku je traženo izjašnjenje od Opštinske izborne komisije Tešanj, Koalicija HDZ BiH HSS BiH, HSP AS, HKDU, HSPAS, HDU, HSPNHB, HRAST, Stranke za BiH i Jasmina Maličevića.

Na osnovu izjašnjenja i dostavljene dokumentacije Centralna izborna komisija BiH je zaključila da je politički subjekt Koalicija HDZ BiH HSS BiH, HSP AS, HKDU, HSPAS, HDU, HSPNHB, HRAST predložila za člana biračkog odbora Jasmina Maličevića koji je bio aktivni član Stranke za Bosnu i Hercegovinu, da je Opštinska izborna komisija Tešanj rješenjem broj 01-08/22 od 05.09.2022. godine imenovala Jasmina Maličevića za člana na glasačkom mjestu 039A028A Tešanj 4-Krndija. Nadalje, utvrđeno je da je Jasmin Maličević dana 14.09.2022. godine podnio zahtjev Opštinskoj izbornoj komisiji Tešanj za razrješenje dužnosti člana biračkog odbora iz privatnih razloga, a da je iz izjašnjenja Stranke za BiH proizilazi da je zbog članstva u biračkom odboru ispred drugog političkog subjekta od imenovanog zahtijevala da se povuče iz biračkog odbora ili da se isčlani iz stranke.

Iz obraloženja ožalbenog rješenja se utvrđuje da je Centralna izborna komisija BiH utvrdila odgovornost žalioca Koalicija HDZ BiH HSS BiH, HSP AS, HKDU, HSPAS, HDU, HSPNHB, HRAST zbog zloupotrebe zakonskog prava na učešće u

radu biračkog odbora tako što je za člana biračkog odbora predložila aktivnog člana Stranke za BiH.

Žalilac je nesumnjivo, primjenom člana 2.19 Izbornog zakona učestvovao u žrijebanju i imenovanju članova biračkih odbora, te dobio mjesto u odboru na biračkom mjestu 039A028A Tešanj 4-Krndija. Ukoliko žalilac nije imao interesa da učešće u radu biračkog odbora obezbjedi putem svog člana, očekivano i razumno bi bilo da ovo pravo iskoristi predlaganjem lica koje nije aktivni član druge političke partije, da bi se izbjeglo pogodovanje drugom političkom subjektu na način da mu se obezbjedi mjesto u biračkom odboru koje ne pripada. Angažovanjem za člana biračkog odbora aktivnog člana druge političke partije koja takođe ima ovjerenu listu kandidata na izborima i koja učestvuje u radu biračkih odbora, stvara se više nego razumna i osnovana sumnja u postupnje protivno zakonu, a koja nije zasnovana na pukim pretpostavkama.

Stoga i prema zaključku ovog vijeća žalitelj je postupio protivno zabrani iz člana 7.3 stav 2 noveliran članom 6 Zakonom o izmjenama i dopunama Izbornog zakona BiH (Sl. glasnik BiH br.51/22). Primjenom člana 19.9 stav 1 tačka 12 istog zakona žalitelju je izrečena novčana kazna srazmjerna težini povrede, kada se ima u vidu da je zaprijećena kazna od 3.000,00 KM do 30.000,00 KM, a da je žalitelju izrečena kazna od 4.000,00 KM, dakle, blizu iznosa zakonskog minimuma.

Ukazivanje žalbe da je ožalbena odluka donesena dana 29.09.2022.godine, a Opšti izbori se održavaju 02.10.2022.godine bez uticaja je na pravilnost i zakonitost odluke. Naime, smisao odredbe člana 7.3 stav 2. Izbornog zakona BiH da se spriječi trgovina biračkim odborima u vrijeme donošenja odluke o izboru članova biračkog odbora i ne povezujući istu sa datumom održavanja\_izbora. Ovakav stav Sud BiH zauzeo u Rješenju broj: SI 3 IŽ 044078 22 IŽ od 12.10.2022.godine. Upravo suprotno stavu žalitelja, Centralna izborna komisija Bosne i Hercegovine ima odgovornost da ovakve pojave spriječi i ne dozvoli trgovinu biračkim mjestima svim ovjerenim političkim subjektima.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA  
SUDIJA**

**Dinka Bešlagić-Čovrk**